

**Inissialiornermut, illunut ataatsimoorussanut, illuliassanut il.il.
tapersiissuteqartarneq pillugu Inatsisartut peqqussutissaattut siunnersuut**

pillugu

Inatsisartut Attaveqaqatigiinnermut Ineqarnermullu Ataatsimiititaliaata

ISUMALIUTISSIISUTAA

Siunnersuutip aappassaaneerneqarnerani saqqummiunneqartoq

Inatsisartut Attaveqaqatigiinnermut Ineqarnermullu Ataatsimiititaliaat
suliarinninnermini ukununga inuttaqarpoq:

Inatsisartunut ilaasortaq Godmand Rasmussen, Atassut, siulittaasoq
Inatsisartunut ilaasortaq Esmar Bergstrøm, Inuit Ataqtigiit
Inatsisartunut ilaasortaq Jürgen Weyer Johansen, Siumut
Inatsisartunut ilaasortaq Vittus Mikaelson, Siumut
Inatsisartunut ilaasortaq Marie Fleischer, Demokraatit
Inatsisartunut sinniisussaq Simon Olsen, Siumut
Inatsisartunut sinniisussaq Ole Thorleifsen, Siumut
Inatsisartunut sinniisussaq Emilie Olsen, Atassut

Siullermeerinerup kingorna Inatsisartut Attaveqaqatigiinnermut Ineqarnermullu
Ataatsimiititaliaata siunnersuut nassuiaatitaalu misissorpai.

1. Siunnersuutip imarisai taakkunungaluk ataatsimiititaliap oqaaseqaatai.

Siunnersuummi immikkoortut pingaarnerit Naalakkersuisut saqqummiussissutaanni
siunnersuummullu nalinginnaasumik nassuiaatini nassuiarneqarput.

Sanaqataasarnermik aqqissuussineq

Nammineerluni illuliornermik aqqissuussinerup manna tikillugu atuuttup
sanaqataasarnermik aqqissuussinermik, illut ilinniarsimasunik ikiorteqarluni
saneqartarnissaannik imaqtumik, taarserneqarnera Ataatsimiititaliamit
isumaqatigiittumit pitsaasutut isigineqarpoq.

Sanaqatigiilluni illuliassanut tapiissutitut isertitaqassutsip tunngavigineqalenera ataatsimiititaliamit isumaqatigiittumit pitsaasutut isigineqarpoq. Nammineerluni illuliornermik aqqissuussineq maanna atuuttoq malillugu – isertitat apeqqutaatinnagit – nammineerluni illuliassamik 1 millioninik nalilimmik 50.000 kr.-inik akilerlugu pissarsisoqarsinnaasimavoq. Taamaalilluni nammineerluni illuliamik pissarsinermi aningaasartuutit INI aqutugalugu inissiamik marlunnik initalimmik attartornermi aningaasartuutinit ukiut marluinnaat ingerlanerini qaangerneqartarput.

Taamaalillutik nammineerlutik illuliorlut aningaasarsiarissaartut, assersuutigalugit sanaartortut, tunisassiorfinni aqutsisut niuernermillu ingerlatsisut pisortanit tapiissutit iluaqutugalugit anaanamit kisimiittumit SIK malillugu isertitaqartumit Nuummi INI-p inissiaataanik najugaqartumit annikinnerarsuarmik ineqarnermut akiliuteqarsinnaasimapput.

Aammattaaq sanaqatigiilluni illulianut, nunatsinni sumiugaluartorluunniit sananeqartunut taarsigassarsisitsisoqarsinnaanissaa tapiissuteqartoqarsinnaanissaalu siunnersuutikkut anguniarneqartoq ataatsimiititaliap paasivaa. Tassa aamma soorlu Nuummi.

Kommunit inissiaataannik attartortittakkanik sanaartornermut Namminersornerullutik Oqartussat tapiissutaat

Kommunit inissiaataannik attartortittakkanik sanaartornermut Namminersornerullutik Oqartussat tapiissutaat pillugit siunnersuummi aalajangersakkat kingunerisaannik Nuup Kommunea kommuninit allanit tamanit ajornerusumik inissineqarpoq. Tamanna piginneqatigiilluni imaluunniit nammineq pigisatut inissiamik realkreditimit aningaasalersorneqarneqartumik Nuummi najugallit pissarsisinnaanerit nunatsinni kommuninut allanut sanilliullugu ajornannginnerusoq inatsimmut nassuiaatini tunngavilersuutigineqarpoq.

Nunatsinni kommunit sinnerinut sanilliullugu piginneqatigiilluni namminerluunniit pigisatut Nuummi inissiamik realkreditimit aningaasalersorneqarneqartumik innuttaasut ilaasa akissallit nunatsinni innuttaasut ilaannit ajornannginnerusumik pissarsisinnaanerit ilimanarsinnaavoq. Tamannali Nuup Kommuniata (initaarnissamut ukiunik 28-nik utaqqiffiusartoq) inissianik nalinginnaasunik pisariaqartitsineranut annerpaajusumut matussuserneqanngitsumulli allannguutaanngilaq.

Tamanna tunngavigalugu Nuummi kommunit inissiaataannik attartortittakkanik sanaartornermut Namminersornerullutik Oqartussat tapiissutaasa kommunini allani kommunit inissiaataannik attartortittakkanik sanaartornermut Namminersornerullutik Oqartussat tapiissutaannit ikinnerunissaat naammaginaranilu naapertuutinnngilaq.

Taamaattumik kommunit tapiissutitigut assigiimmik periarfissaqarnissaasa qulakkeerneqarnissaa siunertaralugu Naalakkersuisut allannguutissatut siunnersuummik saqqummiusseqqullugit ataatsimiititaliamit isumaqatigiittumit kaammattorneqarput.

Taamaattumik kommunit tamarmik assigiimmik tapiiffigineqarnissaminnut qulakkeerniarlugu **Ataatsimiititaliap isumaqatigiittup** Naalakkersuisut allannguutissatut siunnersuummik saqqummiussinissaat kaammattuutigissavaat.

Akiitsunik isumakkeerineq

Akiitsunik isumakkeerisarnermut malittarisassat maanna atuuttut siunnersuummi ingerlateqqinneqarput.

Taamaalilluni § 39-mi aalajangersarneqarpoq taarsigassarsiallit, ukiuni akileraaruteqarfiusuni kingullerni marlunni akileraaruteqaataasussanik 128.000 kr.-it inorlugit isertitaqarsimasut akiitsunut akilinngitsuukkanut akiitsullu sinnerinut isumakkeerfigineqarnissamik qinnuteqarsinnaasut. Isertitanut killiliusseq taaneqartoq 18-it inorlugit ukiulinnut angerlarsimaffimmi najugaqartunut meeqqamut ataatsimut 4.000-inik qaffanneqarpoq.

Aammattaaq taarsigassarsiat piffissami taarsigassarsiat akilersorneqarfissaasa sinnerani taarsigassarsianut ernialersugaanatillu akilersugassaanngitsunut allangortitsinissamut § 40 periarfissiivoq. Tassalu kigaatsumik isumakkeerfiginnineq illup nalinganik taarsigassarsisumut tunniunneqariartuaartoq.

Inuit inuiaqatigiinnut akiitsuminnik akiliinissaminnut periarfissaqanngitsut inuiaqatigiinnit immikkut isiginiarneqarnerat pissusissamisoorluinnartutut ataatsimiititaliamit isumaqatigiittumit isigineqarpoq. Tamatumali akiitsunik isumakkeerinikkut pinissaa inuiaqatigiit soqutigisaannut naapertuutinnilaq. Illumi taarsigassarsinikkut pissarsiarineqarsimasoq sulii naleqarpoq akiitsut isumakkeernerisigut inuiaqatigiinnik annaaneqartussamik. Illu kingusinnerusukkut tunineqarsinnaasoq paasinarsippat, taarsigassarsisoq akiitsuminik isumakkeerfigineqarsimasoq aningaasanik taarsigassarsisitsisup – tassalu inuiaqatigiit – pissaraluinik pissarsissaaq.

Akiitsunik isumakkeerfigineqarnissamik qinnuteqaatinik naliliinermi qinnuteqartup aningaasaqarnera sulisinnaassuseqarneralu kisiisa pinnagit aammali illu pisoqaassusia niuernikkullu nalinga ilanngullugit eqqarsaatigineqartassasut § 41-mi aalajangersarneqarpoq. Allatut oqaatigalugu: Illu tunineqarsinnaasutut isigineqarpat akiitsunik isumakkeerinissaaq ilimagineqarsinnaanngilaq. Niuernikkulli pissutsit allangorartarput. Illu ullumikkut niuernikkut annikitsuinnarmik nalilik ukialuit qaangiuppata niuernikkut nalinga annertuseriarujussuarsinnaavoq.

Inuiaqatigiinni ineqarnermut tunngasut ullumikkut annertuumik ajornartorsiorfiupput. Inissaaleqineq sulii annertuvoq, pisortallu inissiaataannik aserfallatsaaliinermi kinguaattoorutit minnerpaamik aamma taama annertutigalutik. Ajornartorsiutit taakku aqqiivigissagutsigit aningaasartuutigisariaqakkagut annertoqaat.

Taamaattumik immitsinnut aperisariaqarpugut inuiaqatigiit pigisaat nalillit tunniussuutiinnartuarnissaannut akissaqarnerluta. Akiitsunut koruuni ataaseq isumakkeerutigigaangatsigu ineqarnermut tunngasuni ajornartorsiutit

kinguartitassaangitsut aaqqiiviginiarnissaannut koruunimik ataatsimik atugassakinnerulertarpugut.

Taamaattumik allannguutissatut siunnersuummik saqqummiusseqqullugit Naalakkersuisut ataatsimiititaliamit kaammattorneqarput, taamaalilluni § 39 aamma 41 malillugit akiitsunik isumakkeerfigineqarnissamut periarfissaq peerneqarluni, akiitsunillu nalikillilerneqartussaananik taarsigassarsianut erniaqaratillu akilersugassaangitsunut aammalu illumik allamik piginnittoqalersillugu akilerneqartussanngortussanut allannngortitsinissamut periarfissamik taarserneqarluni.

Taamatut periaaseqarnikkut taarsigassarsialik akiitsunik artukkigaasimasooq akilersuutunik ernianillu akiliissanngilaq – soorlu akiitsunik isumakkeerinermi taamaattoq. Tassa taarsigassarsialik kiassarnermut innaallagissamullu akiliutit eqqaassanngikkaanni ineqarnermut akiliuteqartassanani. Akiitsunilli isumakkeerinerup akerlianik akiitsut piujuassapput, illulu tunineqarpat taakku akilerneqassallutik. Namminersornerullutik Oqartussat illumi qularnaveeqqusiissuteqarmata illu naleqarsimappat Namminersornerullutik Oqartussat aningaasat ilaannik pisassaminnik pissarsissapput.

Tunisinermi pissarsiat akiitsunik matussusiinissamut naammangippata akiitsut sinneri taarsigassarsiallip akilissavai. Inuit taamatut inissisimasut akiitsuminnik isumakkeerneqarnissaminnut qinnuteqarsinnaasariaqartut Ataatsimiititaliaq isumaqarpoq.

2. Ataatsimiititaliap inassuteqaataa

Ataatsimiititaliap kaammattuutai naapertorlugit Naalakkersuisut allannguutissatut siunnersuummik saqqummiussereerneranni iluserilikkamisut iluseqarluni siunnersuutip akuersissutigineqarnissaa **ataatsimiititaliap isumaqatigiittup** inassutigaa.

Taama oqaaseqarluni Inatsisartut Attaveqatigiinnermut Ineqarnermullu Ataatsimiititaliaata peqqussutissatut siunnersuut aappassaaniigassanngortippaa.

Jürgen Weyer Jürgen
Siulittaasup tullia

Emilie Olsen

Esmar Bergstrøm

Marie Fleischer

Ole Thorleifsen